

35 Jahr

# Die Abverheyte

## An-Dante con-fusione

Emol e-n-Alty Dante isch e Draum  
Vo jedem fascht, wo z'Basel Fasnacht macht.  
E grosse Huet, e Rischeli am Saum

Und was no sunscht so gheert zue däre Dracht.  
De-n-Abverheyte isch's nit anderscht gange,  
Dä Wunsch isch lang scho in ene verwacht.

Bim glainschte Jubileum isch efange  
d'Frog noh dr Alte-n-an dr GV ko.  
Gäb's Alty Dante z'kaufe vo dr Stange,

Denn wäre mir scho lang erleest drvo.  
Vom spote Herbscht a muess me nimme welle  
E-n-Alty mache-n-oder mache lo,

Und erscht entwärfe und dr Stoff no bstelle.  
Und hätt sy au zem Sujet no so guet basst,  
Me muess sy wider zrugg uff 's Schäftli stelle.

Drum hämmer scho im Summer e-n-Entschluss  
gfasst:  
«D'Majeuse, d'Pfyffere-n-und au d'Trabante  
– Das hett me-n-an dr letschte GV uusgjasst –

Sinn an dr näggschte Fasnacht Alty Dante.  
Jetzt miemer emol aifach ebbis due,  
E Jedes macht sy aigeni Variante.

Vom Herbscht a naje mr in aller Rueh,  
'S basst guet zue unsre 35 Johr,  
E Sujet finde mr denn scho drzue.»

Das hämmer denn no glaubt, 's isch wirgglig wohr,  
Bis 's denne Zyt gsi isch e Sujet z'finde.  
Es stellt sich niemets unsri Quale vor.

Drotz allem Hirny-Schinde und Sich-Winde,  
Bi Cigaretterauch und wyssem Wy,  
Het aifach nie e Fungge welle zinde.

Bi allem wo bassiert isch, ka 's denn sy  
Dass gar nyt basse wott zue Alte Dante?  
D' Aamäldig fir dr Rädäbäng isch gly

Und d'Stimmig isch im beschte Fall an-Dante,  
Allegro, Scherzo, Brio findsch kai Spur,  
Und d'Witz sinn breever als vo Konfirmande.

Das vorgfasst Costume macht aim aifach stur.  
St-Peter's-Corner-Dante, wo dien rätsche,  
Sinn wirgglig nit e bsunders glatty Tour.

'S Theater kennt me grad no yne quätsche:  
« 'S goht uff, erscht wenn mir Alty Dante sinn»,  
Duet aim als Pointe-n-aber nit verdätsche.

Meh liggt au in dr Kläraalag nit dinn,  
Au in däm Räche blybt kai Sujet hängge,  
Und d'Clique glaubt scho sälber fascht si spinn,

Und naime syg e Loch in ihrem Dängge.  
Wenn jetzt no ebbis Rächts sett useko,  
Denn miesst ys ebber zerscht e Dänggloch schängge.

Dur das Inferno simmer noh-di-noh  
No vo de Dante här bim Dante glandet.  
Zwor macht ys au die Landig nit ganz froh,

Es kunnt ys ehnder vor, mr syge gstrandet.  
Mr sinn jo aigedig bi «Dante» blibe.  
Was solls! Und isch my Hirny au versandet,

Y ha jetzt ainewäg Terzine gschribe.

Am Zyschtig goht me in d'Ladärne-Usstellig in d'Basler Halle  
vo dr Muschtermäss.  
Si isch offe vo de morge am nynt bis z'nacht am elfi.